

## 01 糖霜丸

郭聿恩<sup>1</sup>

我是厝裡第一个出世的囡仔，所以從細漢阿公和阿媽就共我惜命命，尤其是阿媽，伊攏講我是伊的「糖霜丸」。若是有我佇咧，啉水都是甜的，毋免食嘛會飽。

其實，我並毋是啥物貼心會弄人笑的囡仔，阿母攏講我是：「雙个旋，惡甲無人問。」柱出世都猶無二四點鐘咧，就予紅嬰仔室的護理師敲電話來投，講我吼甲誠大聲，按怎騙都袂恬，只好來共阿母討救兵。所以，佇別人兜是：「一个囡仔，較鬧熱三个大人。」啊若阮厝是：「一个囡仔，拚倒五个大人。」規厝間的大人，予我這個囡仔疣舞甲食毋成食、睺毋成睺，真正是足忝頭。

彼時阿爸、阿母攏佇高雄食頭路，又閣煩惱倩奶母育毋知敢會予人灌米酒袂，才將我圓佇臺南，拜託阿公、阿媽門相共。彼個時陣個攏已經退休矣，原底叫是炁孫就親像：「桌頂拈柑，輕輕鬆鬆。」想袂到我誠纓纏，一定攏愛人抱，連欲睺嘛愛予人抱咧睺，無，就會吼袂恬。阿公、阿媽無我的法，只好三不五時仔就叫阿爸、阿母轉來替手，連猶未嫁的阿姑嘛愛鬥炁孫。

雖然我遮爾歹炁，毋過，阿媽猶是誠疼我，不管是欲去佗位，伊一定會炁我去。欲炁我出門的時，伊會先用俏

巾共我縛佇伊的尻脊餅，才閣用風慢包予綏。所以，我細漢的時，便若看著阿媽提俏巾和風慢，就會緊爬過去阿媽的身軀邊，喙笑目笑等阿媽抱我出去迢迢。阿媽講我彼个模樣真正足古錐，就算到今，伊猶深深記佇咧頭殼內底。

因為自細漢就綴佇阿媽的身軀邊，毋才我開始學講話的時，講的就是臺灣話。阿媽講我彼時大舌閣興喋，柱咧學話的時，大人一句話攏予我分做三、四節，一直餾、一直餾。若是有人學我講袂輾轉的模樣，我閣會受氣，規个面就膨獅獅，一直愛阿媽來安搭才欲煞。三歲了後予父母炁轉來讀幼稚園，以後的日子嘛因為學業，漸漸較無轉去臺南矣。毋過，便若佇電話中聽著阿媽叫「糖霜丸」的聲，我就會想欲閣轉去阿媽的身軀邊，予伊攏牢牢。

---

<sup>1</sup>郭聿恩(Kueh Ut-un)

## 02 歇睱日

蔡瀚儀<sup>1</sup>

歇睱日阿爸定會炁阮四界去迢迢，這擺阮欲去看水筆仔。水筆仔生長佇淡水河的出海口，這是一種真特別的樹仔。阮小弟阿明上歡喜，因為個自然課挂咧教水筆仔的生態，伊足想欲去看到底水筆仔是按怎咧發穎生濶？雖然捌聽人講過，毋過嘛是猶捎無摠頭，不如親身去看較實在。

阮規家坐捷運去到紅樹林站，來參觀生態館的人誠濟。先看水筆仔生態的影片，予逐家對水筆仔有基本的認捌，導覽才閣炁阮去生態保護園區參觀。哇！看過去規片擺是水筆仔，有一條柴枋釘的步道，彎彎幹幹順河邊行過去，沿路雙爿的水筆仔發甲誠茂。樹仔頂一枝一枝親像毛筆的水筆仔固生誠濟，有的落落來挂好插咧爛塗裡，就生根發葉佇遐大欖，若落佇水面的就綴流水流出去。

流水逐工會來來去去，佇水面的水筆仔固就會綴個四界去，踅去河岸邊，踅到溪仔墘。佇遐咧歇睱的時，毛蟹看著講：「蹕咧啦！遮有誠濟朋友併你做伴，你才袂孤單。」水筆仔固誠歡喜就佇遐蹕，就按呢一代一代生濶落去，無偌久就成做一片紅樹林。湧流的時，大管仙、海和尚、海蛇蟄擺出來賴賴趨。兩尾花鯢咧相僵，共尻脊聳的旗仔褫甲若親像船帆，樹林跤鬧熱滾滾。上趣味的就是兩隻擰白

扇仔咧相戰，共大管跤擰懸懸咧相嚇驚，有夠風神。導覽講，拍輸的有時陣會共大管跤擰咧做伊旋。伊閣問講：「減一肢管無武器，後擺欲按怎伶人相戰？」小弟隨擰手應講：「伊會閣發一肢全款的大管跤。」導覽賞伊一張擰白扇仔的貼紙，逐家閣共拍嘆仔呵咾。

白鴟鸞恰海鳥佇海埔仔咧討食；毛蟹佇塗空潰出潰入真無閒，跤手真猛掠。阿爸講：「跤手若慢鈍連鞭就予海鳥捅去！」

阿母講：「歇睱日來紅樹林看毛蟹挖塗空、看花鯢恰石貼仔有啥無全款？加捌一寡常識才袂讀死冊。」欲暗仔海邊全紅霞，一陣一陣的海風吹來，有一種魚仔的臭臊味。阮坐佇捷運頂懸，窗仔外的水筆仔咧共阮擺手，若咧叫阮有閒才閣來迢迢。

<sup>1</sup>蔡瀚儀(Tshuà Hān-gî)

## 03 無尾巷

周世雄

猶會記得細漢的時，阮兜是跔佇一條無尾巷的上邊仔間。無尾巷的雙爿攏是干焦兩樓懸的透天厝，因為是無尾巷，所以除了倚家的車出入以外，誠少有外來的車駛入來。而且佇彼个時代，大部份攏是 *oo-tóo-bái* 俗跤踏車，所以規條巷仔攏嘛是阮這陣囡仔的天下。

每一擺放學轉來到厝的時，阮這陣規身軀臭汗酸的囡仔部隊攏是趁日頭猶未落山，趕緊共彼時家家戶戶攏愛有的合桌恰童軍椅搬來門跤口的路邊，準備開始寫功課。低年級的囡仔若是拄著袂曉寫的注音符號，闔知影通參考印佇桌仔面頂的『ㄅㄆㄇ』；中年級的若看著貧惰想的計算題，嘛會使光明正大看全款印佇桌面頂的九九乘法表，這塊聰明的合桌真正是阮彼个囡仔時代無法度放袂記得的 *má-tsih*；高年級的囡仔兄、囡仔姊的功課有較困難，個有時陣會互相討論。較貧惰學的，就會用糖仔餅抑是尪仔標來交換答案。彼時規條巷仔排甲齊齊齊的桌仔，大粒頭、細粒頭，有的轉正爿，有的幹倒爿，有的覆低低，有的擰懸懸，遠遠看過去若親像加工區的生產線，逐家攏趕緊咧趁天色猶未暗，拍拚完成家己的作業。

若是功課寫了矣，逐家就開始那摸橐袋仔內底的銀角

仔，那對巷仔口的簸仔店衝去。簸仔店的頭家娘逐家攏叫伊「錢嫂仔」。見擺看著阮這陣囡仔疟暎佇狹檻檻的店內，聽著 *khin-khin-khiang-khiang* 的銀角仔聲，伊攏喙笑目笑問阮欲買啥物？每一个囡仔目睭嘛襯甲大大蕊，看著店內誠濟款的四秀仔，闔有彼時上時行的抽鬮仔兼對獎品，大部份的囡仔攏會躊躇一下才決定欲買的物件，有時嘛會交換分享家己手內的糖仔餅俗迢迢物仔。

若是時間欲倚六點的時陣，規陣囡仔就若親像有經過訓練的部隊，逐家攏用走百米的速度從轉去家己的厝，準備食飯配電視。這陣規條巷仔就不時放送出 *bàng-gà* 主題曲的音樂聲，定定嘛會使鼻著無全口灶阿母手路菜的芳味。尤其是巷仔口彼支路燈著的時，若親像咧為這條充滿幸福的無尾巷點一葩圓滿的燈火。